

Samgöngu- og sveitarstjórnarráðuneytið
Sölvhólgötu 7
101 Reykjavík

Efni: Umsögn um drög að reglugerð um vinnuskilyrði farmanna á farþega- og flutningaskipum.

Hinn 8. febrúar sl. birti samgöngu- og sveitarstjórnarráðuneytið drög reglugerð um vinnuskilyrði farmanna á farþega- og flutningaskipum (hér eftir nefnd reglugerðin). SVP – Samtök verslunar og þjónustu (hér eftir samtökin) hafa yfirfarið reglugerðardrögin og vilja af því tilefni koma tveimur ábendingum á framfæri.

Gildissvið.

Gildissvið reglugerðarinnar er afmarkað í 1. gr. hennar. Tekið er í fram í 2. mgr. að hún gildi um öll íslensk skip með tilteknum undantekningum. Í 3. mgr. segir að þá gildi 5. og 6. gr. reglugerðarinnar um erlend farþega- og flutningaskip sem eiga leið um íslenskar hafnir.

Að mati samtakanna kann sú spurning að vakna hvort ákvæði 3. mgr. 1. gr. beri að skilja þannig að 5. og 6. gr. reglugerðarinnar gildi aðeins um erlend skip eða hvort merkingin sé sú að 5. og 6. gr. gildi um innlend og erlend skip þrátt fyrir að samkvæmt gildissviðsafmörkun 2. mgr. greinarinnar nái reglugerðin aðeins til innlendra skipa. Þá er ekki skýrt hvort öll ákvæði 5. og 6. gr. eigi við erlend skip eður ei. Í þessu samhengi er rétt að benda á að í 6. mgr. 5. gr. er sérstaklega tekið fram að skylda til að leggja fram tryggingu hvíli bæði á útgerð innlendra og erlendra skipa. Sama á við um 9. mgr. Þetta er hins vegar ekki tekið fram í öðrum ákvæðum 5. og 6. gr.

Heimferðir.

Í 5. gr. reglugerðarinnar er kveðið á um rétt skipverja til heimferðar. Viðamiklar skyldur eru lagðar á útgerðir í þessu samhengi.

Að mati samtakanna verður hins vegar að gera greinarmun á rétti til heimferðar í ljósi atvika sem beinlínis tengjast ákvarðanatöku í rekstri útgerðar og þeim rétti sem farmenn eiga þegar orsök heimferðar má alfarið rekja til athafna farmannanna sjálfra. Í því ljósi leggja samtökin til að nýrri málsgrein verði bætt við 5. gr., svohljóðandi: *Þó á skipverji ekki rétt á heimferð samkvæmt grein þessari ef hann hefur brotið alvarlega gegn ákvæðum ráðningarsamnings, framið lögbrot eða viðhaft ámælisverða háttsemi sem veldur uppsögn hans.*

Virðingarfyllt,

F.h. SVP – Samtaka verslunar og þjónustu

Benedikt S. Benediktsson, lögfræðingur.